



**Komunikadu Imprensa**  
**31 Marsu 2020**  
**Munisípiu Bobonaro**

**Xefe suku Hataz rekoñese katak Konsellu Suku no comunidade sira falta tebes informasaun sira hanesan JSMP fahe liuhosi treinamentu ne'e**

Iha 27 Marsu 2020, JSMP realiza treinamentu kona-ba demokrásia no asesu ba justisa formál iha suku Hataz, Postu Administrativu Atabae, Munisípiu Bobonaro. Partisipante sira kompostu hosi membru konsellu suku, comunidade no representante grupu fetu sira. Totál partisipante hamutuk ema na'in 30 ne'ebé kompostu hosi fetu na'in 14 no mane na'in 16.

“Treinamentu ne'e nu'udar meus importante ida ne'ebé JSMP uja durante ne'e hodi kontinua habelar informasaun importante sira ba Konsellu suku no comunidade sira ne'ebé iha área rurál hodi hasa'e sira-nia koñesimentu iha área demokrásia no justisa ho nune'e sira bele ezerse sira-nia funsaun serbisu lor-loron ho di'ak liutan tuir prinsípiu demokrasia no lei sira ne'ebé eziste iha Timor-Leste,” dehan Casimiro dos Santos, Diretór Interinu JSMP.

Durante sesaun treinamentu ne'ebé kobre kestaun demokrásia, knaar órgaun soberania sira-nian, partisipasaun públiku iha prosesu halo lei no oinsa asesu ba justisa formál. Partisipante sira mós hato'o sira-nia preokupasaun relasiona ho direitu no devér sira iha nasaun ne'ebé uza sistema demokrasia, nune'e mós oinsa prosesu kazu krime violénsia seksuál no violénsia doméstika inklui mós kazu sivíl kona-ba na'in ba rai ne'ebé akontese iha sira nia suku no oinsa dalan atu halo prosesu kazu hirak ne'e tuir justisa formál.

Hatán ba kestaun hirak ne'e, JSMP esplika katak iha nasaun ne'ebé opta sistema Governasaun demokrásia ema hotu iha direitu no devér hanesan iha lei nia oin hanesan konsagra ona iha Konstituisaun RDTL no lei sira. Prinsípiu no valór sira demokrásia nian mak tenke respeitu direitu ema seluk nian, ida ne'e hanesan devér ida atu aseguira ema seluk nia direitu la bele hetan violasaun.

Entretantu kona-ba oinsa atu bele prosesu kazu krime sira tantu krime Violénsia Doméstika (VD) ka Violasaun Seksuál (VS), JSMP esplika uluk kona-ba krime nia natureza; krime públiku no semi-públiku no krime VD no VS tama iha kategoria ba krime públiku, tuir ita-nia lei Kódigu Penál, sé de'it mak hetan ka haree bele hato'o keixa ba Ministériu Públiku ka polísia nu'udar autoridade kompentente hodi bele halo prosesu tuir dalan formál ne'ebé eziste.

Relasiona ho kazu sivil ne'ebé iha JSMP rekomenda atu hosi parte rua ne'ebé disputadu bele buka ida-idak nian advogadu hodi hato'o sira-nia asaun ba tribunál hodi bele rezolve tuir dalan formál ne'ebé eziste.

Xefe Suku, Sr. Diamentino dos Santos iha ninia intervensaun, haktuir katak nia parte agradese tebes ba JSMP tanba bele realiza ona treinamentu importante ne'e iha sira-nia suku. Materia ne'ebé JSMP fornese ne'e importante no relevante tebes ba sira-nia knaar lorloron nian nu'udar membru konsellu suku.

Xefe suku ne'e mós rekoñese katak konsellu suku no comunidade sira falta tebes informasaun sira hanesan JSMP fahe ne'e, no nia espera katak ho informasaun ne'ebé JSMP fahe bele ajuda konsellu suku no comunidade sira atu oinsa bele uja sira nia direitu rasik.

Programa ne'e hetan apoiu hosi Governu Repúblika Demokrátika Timor-Leste (RDTL) liuhosi Gabinete Apoiu Sosiedade Sivil, Gabinete Primeiru Ministru.

Atu hetan informasaun liutan favór kontaktu direktamente:

Casimiro dos Santos  
Diretór Ezekutivu Interinu JSMP  
Email: [casimiro@jsmp.tl](mailto:casimiro@jsmp.tl)  
Telefone: 77257466 | 3323883  
Website: <http://jsmp.tl/>